

**ԻՄԱՍՏՈՒՆ ՏԻՐԱՅՈՒՆ / Հայ ժողովրդական հեքիաթներ, Հատոր VIII / Գուգարք (Լոռի),
Լոռու բարբառ (խոսվածք)**

Մի մարթ ու կնիկ են ըլլւմ, իրեք ըրեխա են ունենւմ: Ամենաքասըբնու քասիբն են ըլլւմ:
Կնիկն ասւմ ա.— Այ մարթ, էսա կարւմ չենք ապրինք, գնա տերտերի ձեռն ու ոտն ընգի, բալի
մի էրկու խզմզորիկ անէ, քի տա, մի փլասւմ փթաթէ, տար կնանտնցն ասա՝ գրբաց եմ, բալի
մի բան տան՝ ապրինք:

Ասւմ ա.— Ա՛ տնաքանդ, գիր չի գիդեմ, սև ու սպիտակը ջգրւմ չեմ, գնամ ի՞նչ անեմ:

Ասւմ ա.— Բան չի կա, աստոծ ըղորմած ա, հլբաթ մի բան դուս կգա՛, գնա, փոշմանիլ չես:

Մի դշահապկա էլ կարւմ ա, կոխկիցը քաշ անւմ, գոռով էն նաչարին բոթբոռտելով դրգրւմ ա:

Գնւմ ա տերտերին դանչանք անւմ ա, տերտերն էլ մի էրկու խզմզորիկ անւմ ա, մի փալասւմ
փթաթորում, ասւմ ա.— Գնա, ա՛, տնաքանդ, ըրեխեքդ սոված կտորվում են, բալի մի կտոր
հաց իրաց անես, ըրեխեքդ պիես:

Էն գիրը վի կալած, դա վի ա կենւմ՝ գնւմ ա: Գնւմ ա, գնւմ, մի ծմակւմ, թալի կես տեղը,
տենւմ ա՝ հրես մի ուխտ բարցած՝ նստած ա: Վախւմ ա թէ մոդ գնա, ասւմ ա.— Ո՞վ գիդէ, ի՞նչ
ա վրեն բարցած, տերը դուս կգա խայտառակ կանէ: Աղաք ա գնւմ, տենւմ ա՝ հրես էն ուխտին
ոնց են ման գալի:

Դրան հարցնւմ են, ասւմ են.— Դու ի՞նչ մարթ ես:

Ասւմ ա.— Ես գրբաց եմ:

Ասւմ են.— Դե հլա գիրդ բաց արա, մեր ուխտը կորել ա, տես հլա ո՞րդի ա:

Դա փալասը բաց ա անւմ, գրին մտիկ անւմ, ասւմ ա.— Հրեն ձեր ուխտը էն թալւմը նստած:

Ասւմ են.— Ընդի շատ ենք մտիկ արել:

Ասւմ ա.— Գնացեք, թէ ընդի չլի, էկեք իմ աչու ձեռը կտրեցեք:

Էնա գնւմ են ու գոնւմ: Էն ուխտի վրա էլ թաքավորի խազինեն ա ըլլւմ բարցած:

Դրանք ասւմ են.— Էս իմաստուն մարթին մենք բաց չենք թողուլ, սրան տանինք թաքավորի
կուշտը:

Էնա մի քսան-եռեսուն մանեթ են տալի: Սա վազելով տանւմ ա կնգանն ա տալի:

Կնիկն ասւմ ա.— Ա՛յ մարթ, տեհա՛ ր՝ որ ասի աստոծ ըղորմած ա: Գնա՛, այ մարթ, գնա վախիլ
մի:

Ենա եդ վի ա կենւմ, գնւմ, ասւմ ա.— Հլա գնամ տենամ թաքավորն ի՞նչ պտի տալ, որ ուխտը
գդել եմ:

Հետներուն տանւմ են թաքավորի կուշտը:

Ասւմ են.— Թաքավորն ապրած կենա, էս մարթն իմաստուն ա, սիե-սիե, մեր ուխտը գդել ա:

Ասւմ ա.— Դե սրան բաց մեք թողուլ, գնացեք սրա ըրեխանցն ու կնգանն էլ բերեք:

Ձիան են վի ունւմ, գնւմ են՝ բերւմ:

Մի օթախ են տալի, միջին դնւմ են, մի սուրու էլ ապրուստ են տալի, պիւմ:

Օրի մի օրը թաքավորի կնիկն իմանւմ ա, որ սիենց իմաստուն մարթ ա էկել:

Իրան քոծին դրգրւմ ա, ասւմ ա.— Իմ նշանի մատնուքը կորել ա, ինչ ուզենա՛ կտամ, թող գա
գոնի:

Դա կնգանն ասւմ ա.— Բա հմի բան չգիտեմ, գնամ ի՞նչ անեմ, ա տնաքանդ:

Ասւմ ա.— Վախիլ մի՛, գնա՛ աստոծ ըղորմած ա:

Մատնիքն էլ, էն կրակի էկած, քոծն ա գողացած ըլլւմ:

Ասւմ ա.— Տիրացու ջան, գլխիդ ու արևիդ մատաղ ըլիմ, մատնուքը ես եմ վի կալել, հմի
ըմանչւմ եմ՝ թէ իրան տամ: Ես գիդեմ գալ տիս ինձ ըռեխ տիս տալ, ախպեր ինչ ուզենաա՛

կտամ, ինձ ըռելի մի տալ: Էն մատնիքը տանինք մի դագի կուլ գձիլ տանք, էնա դուն արի գրիդ մտիկ արա, ասա.— Ղագի փորումն ա:

Վի են կենըմ, գնըմ:

Ասըմ ա.— Տիրացու ջան, իմ նշանի մատնուքը կորել ա, գդի, ինչ ուզենաս, քի կտամ: Հմա որ գդնես ոչ, ես բողմի կգամ:

Էն քոծը մատնուքը տարած ա ըլըմ մի չոլախ դագի կուլ գձիլ տված ա ըլըմ:

Էն կրակի էկածը, մթամ գրին մտիկ ա անըմ, ասըմ ա.— Դու գլուխդ լվանալիս ես էլել, հանել ես՝ գրել ըստողի վրա, կուռդ դիրել ա, վեր ա ընգել, ձեր չոլախ դագն էկել ա կուլ գձել, հրե քչըմն ա:

Ասըմ ա.— Ախչի-ախչի, գնա դագը բի: Գնըմ ա բերըմ, մորթըմ են, դրուստ որ մատնուքը հանըմ են:

Ասըմ ա.— Վա՛յ, ես քու գլխին ու արևին մատաղ, տիրացու ջան: Եղնա մի սուրու փող ա տալի, գնըմ ա:

Ուրախանաս՝ ինչ կնիկն ուրախանըմ ա:

Ասըմ ա.— Բա որ ասելի, դու հլե ցավոտըմ ես:

Դրանք մի բոլ հարստանըմ են:

Մի օր էլ էդ գեղըմը մի ժամ են շինըմ, մի քանի տավար են մորթըմ, պղնձնին լիքը խորակ են էփըմ, որ ժամն օծեն, եղնա քեփ անեն: Էդ տիրացվին էլ կանչըմ են, տանըմ վերի ծերին նըստացնըմ, որ դա էլ խալիսի ըղաքին օխնիլ տի ժամը: Էդ կրակի էկածը մի բան էլա գիդե ոչ:

Ասըմ ա.— Հմի ես ի՞նչ անեմ:

Մըն էլ եդ ա մտիկ անըմ, էնքան խալիսը տենըմ ա թե չէ, սիրտը պատոըմ ա: Ասըմ ա.— ես փախչիլ տիմ, ջհանդամը, թե ինձ եղնա կսպանեն:

Վի ա կենըմ ու փախչըմ: Դրան որ փախչելիս տենըմ են հա, խալիսը եղնեն չիմ դուս ա դառնըմ, որ սրան բռնե: Հլե չիմ դուս են գալի թե չէ, ժամը չոքըմ ա, փուլ ա գալի:

Էնա նոր գնըմ են սրա ոտն ու ձեռն ընգնըմ, ասըմ են.— Ըշխարի ըրեսին սհե իմաստուն մարթ, մին էլ սա յա:

Էնա էն գեղըմը դառնըմ ա իմաստուն, թաքավորի բարեբար մարթ: Բախտավորվիս, ինչ բախտավորվըմ ա: